

七十二家集

梁簡文帝御製集卷之六

梁太宗簡文皇帝蕭綱著

詔

收元詔

蓋天下者至公之神器在昔三五不獲已而臨蒞之故帝王之功聖人之餘事軒冕之華儻來之一物太祖文皇帝含光大之量啓西伯之基高祖武皇帝道洽二儀智周萬物屬齊季薦瘡爨倫剝喪同氣離入苑之禍元首懷無厭之欲

乃當樂推之運因億兆之心承彼犄角雪茲讐
耻事非爲已義實從民故功成弗居卑宮菲食
大慈之業普薰汾陽之詔屢下于茲四紀無得
而稱朕以寡昧哀氛孔棘生靈已盡志不圖全
僂俛視陰企承鴻緒懸旌履薄未足云喻痛甚
愈遲諒闇彌切方當玄默在躬栖心事外卽王
道未直天步猶艱式憑宰輔以弘朕政履端建
號仰惟舊章可大赦天下改太清四年爲大寶
元年

卽位赦詔

朕以不造風丁閔凶大行皇帝奄棄萬國攀慕
號躋臂身靡所猥以寡德越居民上乳乳在疚
罔知所托方賴藩輔社稷用安謹遵先旨顧命
遺澤宜加億兆可大赦天下

營莊陵詔

簡皇后窀穸有期昔西京霸陵因山爲藏東漢
壽陵流水而已朕屬值時艱歲饑民弊方欲以
身率下永示敦朴今所營莊陵務存約儉

令

與劉孝儀令

劉遵爲晉安王宣惠雲麾二府記室轉
南徐州治中後爲雍州復引爲安北諮
議參軍及王立爲皇太子仍除中庶子
大同元年卒太子深悼惜之與遵從兄
孝儀

令

賢從中庶奄至殞逝痛可言乎其孝友淳深立
身貞固內含玉潤外表瀾清美譽嘉聲流於士
友言行相符始終如一文史該富琬琰爲心辭
章轉瞻玄黃成采旣以鳴謙表性又以難進自

居未嘗造請公卿締交榮利是以新沓莫之舉
杜武弗之知自阮放之官野王之職栖遲門下
已踰五載同僚已陟後進多升而怡然清靜不
以少多爲念確爾之志亦何易得西河觀寶東
江獨步書籍所載必不是過吾昔在漢南連翩
書記及忝朱方從容坐首良辰美景清風月夜
鷁舟乍動朱鷺徐鳴未嘗一日而不追隨一時
而不會遇酒闌耳熱言志賦詩校覆忠賢權楊
文史益者三友此實其人及弘道下邑未申善

政而能使民結去思野多馴雉此亦威鳳一羽
足以驗其五德比在春坊載獲中脰博望無通
賓之務司成多節文之科所賴故人時相嬾偶
而此子溘然實可嗟痛惟與善人此爲虛說天
之報施豈若此乎想卿痛悼之誠亦當何已往
矣柰何投筆惻愴吾昨欲爲誌銘并爲撰集吾
之劣薄其生也不能揄揚吹噓使得騁其才用
今者爲銘爲集何益旣往故爲痛惜之情不能
已已耳

劉孝儀上東宮啓附

亡從弟遵百行無點千里立志同氣三荆之
友假寢十起之慈皆體之於自然行之如俛
拾自礪宮陪宴釣臺從幸攀附鱗翼三十餘
載茫昧與善一旦長辭劍匿光芒璧碎符采
躬播神筆親動妙思雖每想南皮書憶阮瑀
行經北館歌悼子侯不足輩此深仁齊茲舊
愛

與湘東王論王規令

王規字威明爲太子中庶子大同二年卒太子出臨與湘東王令

威明昨宵奄復殂化甚可痛傷其風韻適正神
峰標映千里絕迹百尺無枝文辯縱橫才學優
贍跌宕之情彌遠濠梁之氣特多斯實俊民也
一爾過隙永歸長夜金刀掩芒長淮絕涸去歲
冬中已傷劉子今茲寒孟復悼王生俱往之傷
信非虛說

卹孔休源手令

金紫光祿大夫孔休源立身中正行已清恪昔
歲西浮渚宮東泊枌壤毗佐蕃政實盡厥誠安
國之詳審公儀之廉白無以過之奄至殞喪情
用惻怛今須舉哀外可備禮

與衡山侯恭手令

雍州蠻引魏寇詔恭赴援除雍州刺史
太宗少與恭游特被賞擢至是手令

彼士流骯髒有關輔餘風黔首杆格但知重劒
輕死降胡惟尚貪恠邊蠻不知敬讓懷抱不可
阜白法律無所用施願克實邊戍無數遷徙謀
候惟遠箱廩惟積長以控短靜以制躁早蒙愛
念敢布腹心

臨城公夫人停省太子妃令

纁鴈之儀旣稱合於二姓酒食之會亦有因不
失親若使榛栗服修贄饋必舉副笄編珈盛飾
斯備不應婦見之禮獨以親闕頃者敬進醢醢
已傳婦事之則而奉盤沃盥不行侯服之家是
知繁省不同質文異世臨城公夫人於妃旣是
姑侄宜停省

教

移市教

臨淮作守白鹿隨而忘返蕭令解綬黃雀從而
不歸况復衛卒遮車追民擁榜瞻言前古恥愧
弘多吾旅泊冬川阻茲涸水日中總會交貿遷
移雖樊無外取要得所求而旗亭舊體自有常
處不容近違孔奮遠逐曹參正恐舊肆盈虛或
成彫廢

復臨丹陽教

昔越張脩猛用弘美績邊延善政實著民謠吾
冲弱寡能未明理道猥以庸薄作守京河將恐
五袴無謠兩岐難頌思立恩惠微宣風範

臨雍州原減民間資教

誠欲投軀決堤曝身求雨九伐方弘三驅未息
役爨之憂兵家斯急師興之費日用彌廣今春
流旣長鱸舳爭前轉漕相追饋糧不闕義存矜
急無俟多費

臨雍州革貪情教

壯夫疲於櫟甲匹婦勞於轉輸藜藿難克轉歿
溝壑春蠶不暖寒肌冬收不周夏飽胡寧斯忍
復加哀削傷盜抵罪遂爲十一之資金作贖刑
翻成潤屋之產

圖雍州賢能刺史教

黃州表朱穆之象太丘有陳寔之畫或有留愛
士民或有傳芳史籍昔越王鎔金尚恩范蠡漢
軍樂壽猶高賈彪矧彼前賢寧忘景慕可並圖
象聽事以旌厥善

罷雍州恩教

折以片言事關徃聖寄之勿擾傳彼昔賢故刻
木不割盡獄無入吾自之雍矜懷固玆幸得天
無虛旱地歇怪蟲今軸車行塗舟艤且戒植柳
官渡尚或依然寄飯曹儻猶思恩宥况義化君
民節離寒暑憫茲岐路宜留惠澤

與僧正教

此州伽藍支提基列雖多設莊嚴盛脩供具觀
其外迹必備華侈在乎意地實有未弘何者凡
鑄金刻木鏤漆圖瓦蓋所以俾傳應身遠注靈
覺羨龍飛之始晨迫鵲林之餘慕故祭神如在
敬神之道旣極去聖茲遠懷聖之理必深此土
諸寺止乎應生之日則斲列形像自斯已後封
以篋笥乃至藥服離身尋炎去頂或十尊五聖
共處一厨或大士如來俱藏一櫃信可謂心與

事背貌是情非增上意多精進心少昔塔裏紅
函止傳舍利象頭白繖非謂全身夫以畫像追
陳尚使吏民識敬鎔金圖範終令越主懷思匹
以龍阿尚能躍鞘方之虎兕猶稱出柙況復最
大圓慈無上善聚聞名去煩見形入道而可慢
此雕香蘊斯木櫟緘匿玉毫封印金掌旣殊羅
閣久入四天又異祇洹掩戶三月寶殿空臨瓊
階虛敞密帷不開非伸舒之曲學紅壁長掩似
邠卿之避讎且廣厦雲垂崇薨烏跂若施之玉

塵飾以金釧必不塵霑
呂姿虧點月面琉璃密
窻自可輕風難入龍鬢
細縷足使飛燕不過兼
得虔敬之理必崇接足
之心彌重可卽宣勒永
使堆行

資遣孔燾二女教

夫思人生至輕事惟悼往表閭式墓義匪字旅
至如游殷之息見撫張旣橋玄之子受託魏王
斯故美在令終愛兼身後故無錫令孔燾經術
弘長志敏貞槩遊處積年一朝長往聞其在室
二女並未有行可廣訪姻家務求偶對

甄異張景願復讎教

夫理感禽魚道均荆棘亦有鄉因行改江以孝
緣張景願自縛到郡稱其父爲韋法所殺今於
公田渚斬法級祭墓訖束身歸官昔沂澤撫劍
河南執戟遠符古義寔足可嘉防廣刃讎赦其
桎梏之罪丁蘭雪耻擢以大夫之位

移文

答穰城求和移文

屬彼數及侮亡運逢瓦解石言水關實驗地函
飛絮雨粟還符天怪故淪俗駿奔遺黎南請所
以皇略北征事同拯溺懸百姓之未安傷一物
之失所故餘民襁負掃地來王而向化之黨忽
覽今移咸以陶茲禮樂重覩衣冠已變伊川之
髮兼削呼韓之袵寧當生入玉關死歸建業民
情若此匪我求蒙行人遠屆實亦勞止想近察

時機遠詳圖緯早去中原遽反桑梓旋地脈而
北移越天梁而南指然後三姓二賢可存十半
如其遂固守殊不達玄象將恐衛將之師復有
狼居之戰應侯之計更覩陰山之哭

梁簡文帝御製集卷之七

梁太宗簡文皇帝蕭綱著

表

謝立爲皇太子表

伏見詔書以臣爲皇太子有命自天實驚物聽
鴻名盛典爰萃庸薄勢舉千鈞方茲未重高搏
九萬比此非遙臣本凡質賔實無取特以毓慶
雲霄憑暉璿極鳴玉內侍指麾外藩猶懼不任
尚疑廢職况復監撫守從道著前經恭敬溫文

義彰昔記震維禮絕離景事尊養德北宮贊業
東序魏平非擬漢莊靡繼臣牧拙樊漢始獲言
歸遂以下才屬當上嗣事異定陶之舉有類膠
東之冊將何以著三善之德延四皓之遊屈叔
譽之辭繹下蘭之頌

拜皇太子臨軒竟謝表

臣聞闔暉飛天游雷居震必資令德實建賢明
臣本空薄器業無取已慙好儒之志且乏豐下
之姿叨逢慈獎事出希世方將問安寢門視膳
天幄察陳奏之章示嚴警之書出龍樓而祇召
息車馳道待鑾輿而巡幸說經孔庭足踐閭闔
風雲之勢斯近飛陵倒景神仙之舉超然何以
允副元良和茲守器逢師曠之褒值史丹之述

謝賜新曆表

五司告肇萬壽載光琯叶璧輪慶休寶曆班和
布政懸闕徇道式弘敬授之典載闡浹辰之教

又

璿籥環璣鳳司肇律觀斗辨氣玉琯移春萬福
維新尅固天保

上昭明太子集別傳表

臣聞無懷有巢之前書契未作華廬赫胥之氏
墳典不傳若夫正少陽之位主承祧之則口實
爲美唯稱啓謠自茲厥後罕或闡焉昭明太子
稟仁聖之姿縱生知之量孝敬無極溫恭在躬
明月西流幼有文章之敏羽籥東序長備元良
之德蘊茲三善弘此四聰非假二疎寧勞四皓
虎賁惡其經學智囊慙其調護豈止博望延賓
壽春能賦問疑棗據書戒憑陵而已哉玉折衡

追星頽靡續地尊號嗣外陽之術無徵位比周
儲緱山之駕不反臣以不肖妄作明離出入銅
龍瞻仰故實思所以掄揚盛軌宣記德音謹撰
昭明太子別傳文集請傳之延閣藏諸廣內永
彰茂實式表洪徽

上大法頌表

臣綱言臣聞至理降而德音闡成功臻而頌聲
作在乎奚斯考甫神雀嘉樹或止事乎區中慶
昭乎一物猶且手舞足蹈傳式方來况廼道出
百非義高三代而可閣筆韜詞詠歌不作者也
伏惟陛下天上天下妙覺之理獨圓三千大千
無緣之慈普被慧舟匪隔法力無垠躬紆尊極
降宣至理澤雨無偏心田受潤是以九圍共溺
並識歸涯萬國均夢一日俱曉佛法之勝事國

家之至美稽之上古未有斯盛雅頌之作不可
闕也謹上大法頌一首曹丕從征之賦劉坦遊
侍之談魯無連類伏蕪慄慄不勝喜悅之誠謹
遣狀詔鍾超寶奉表獻頌以聞

上南郊頌表

雖周郊南甸宗伯之官徒設漢興北峙寅恪之
道未隆而體元含極先後弗違典盛望禋理通
孝敬潔靜之禮載光禘郊之風斯洽昔東平琅
琊著藻炎德臨淄中山摘文魏美

上白兔表

瑞表丹陵祥因舊沛四靈可邁既驗玉衡之精
千歲變采有符明月之狀豈殊丹岫之羽來止
帝梧庶比素質之禽得遊君園

請朱昇奉述制旨易義表

臣聞仰觀俯察定八卦之宗河圖洛書符三易
之教譬彼影圭居四方之中極猶彼黃鍾總六
律之殊氣疑關永闢踰弘農之洞啓辭河旣吐
邁龍門之已鑒臣以庸蔽竊尚名理鑽仰幾深
伏惟舞蹈具欲請侍中右衛將軍臣昇於玄圖
宣猷堂奉述制旨易義弘闡聖作垂裕蒙求謹
以表聞伏願垂允

請賀琛奉述毛詩義表

臣聞樂由陽來性情之本詩以言志政教之基
故能使天地咸亨人倫敦序故東魯夢周窮茲
刪採西河紹魏著彼繼述叶星辰而建詩觀斗
儀而命禮以爲陳徐雅頌膏肓匪一燕韓篇什
痼疾多端吐海鄭君徒逢箋釋南郡太守空爲
異序庶令中和永播碩學知宗大胥負師國子
咸紹孝敬之德化洽天下多識之風道行比屋

爲寧國臨城二公請入學表

臣聞瞻彼緝弧旣濱良冶相諸筍玉猶藉他山
故沮洳之水可居鄒魯之鄉爲貴下帷投斧昔
人以爲精力棄竿委麥先哲以爲美談伏惟陛
下弘至德之微言闡無爲之妙說話郊講道不
勞賈生之議就陽啓位無待公王之圖願得齒
年國胄隨肩選造

讓鼓吹表

寬博爲善不飾被於聲明緣寵成功未增榮於
鐃管豈宜響芳樹於西河鳴朝飛於黑水彼已
之譏何懼尸素之誠知慙

讓驃騎揚州刺史表

常願親侯就列希同特進之班角巾還第不競
龍驤之賞而天澤無涯名器總集竊以驃騎之
官旣爲上將神州之重實號中土故以彈壓六
戎冠冕九牧豈止司隸絳節金吾緹騎况復任
總皇畿位重連率驃騎之號歷選爲重元狩之
中始自去病永平之建特受劉蒼齊憲爲公主
所申吳漢因群臣之舉

在州羸疾自解表

昔違紫複曾不弱冠今夢青蒲逝將已立願歸
之謂不逮宸矜民請之書遽降天允屬上黨之
雄山西宣將五校失道八尉驕貪一箭而解重
圍更成戎阻九戰而絕甬道翻就喪師雖王郭
不追朱買難嗣實以褰襜明目日夜厲精地雜
黠羌民多獷俗人非公孝欲使任類汝南勲異
伯宗必須榮踰戊巳州牧良才實屬多士無令
非薄徒積妨賢

爲武陵王讓揚州表

臣延首青冥傾心紫府言非東里誠譬北辰而
滔滔雲漢不被霈然之澤鬱鬱僊居方隔下臣
之奏周任量力固請所陳明主理奪伏冀照許
臣聞繫風捕影涉求之路靡階玉馬金舟過遠
之資無託

爲長子大器讓宣城王表

襄野之辯尚對軒君弘羊之計猶干漢主徒以
結慶璿源乘蔭霄極一日千里因騏驥之馳高
陰百尺藉雲崖之遠熙祖流聰慧之稱方建臨
淮之國元仲表岐嶷之姿乃啓平原之封南郡
與部春穀名區民化仲翔之俗山峻陵陽之嶺
而綠車赤綬交映相暉金璽銀券炤灼光彩

爲子大心讓當陽公表

日蝕之餘無黃童之對荷戟入榛異子烏之辯
遂復早建茅社夙開井賦爵列五等綬參四色

爲子大款讓石城公表

詭對鶴書俯羞鴉翼臣生處深宮未覲焦原之
險不出戶庭豈觀砥柱之峻臣聞均塘汎水豈
議大瀆之流覆簣爲峰終乖小魯之說

疏

懲囚徒疏

伏以明慎三典寬簡八刑宸鑒每以垂心國誥
是焉攸切臣以此時奉勅權視京師雜事切見
南北郊壇材官車府太官下省左裝等處上啓
並請四五歲以下輕囚聊充使役自有刑均罪
等憊目不異而甲付錢署乙配郊壇錢署三所
於辛爲劇郊壇六處在役則優今聽獄官詳其
可否舞文之路自此而生公平難遇其人流泉

易啓其齒將恐玉科重輕全關墨綬金書去取
更由丹筆愚謂宜詳立條制以爲永准

武帝勅報附

頃年已來處處之役唯資徒隳逐急克配若
科制繁細義同簡約切須之處終不可得引
例興訟紛紜方始防杜姦巧自是爲難更當
別思取其便也

章

爲南平王拜大司馬章

臣度連宸萼地實璿跼王業權輿夙奉締構爰
頒盧綰同贊密謀豫均鄧禹俱奉明詔故搏飛
九萬實假扶搖之力冲天百尺無俟剏厠之勞

爲王規拜吳郡太守章

臣今願歛衽後思循牆所忝示山河而形勝顧
浮橋而不見蒼鷹一遊望仙掌而逮然方當駕
吉祥之車入勾吳之地驅緹扇之馬撫奉德之
鄉製錦何階焚絲方始

梁簡文帝御製集卷之八

梁太宗簡文皇帝蕭綱著

啓

賀洛陽平啓

自函洛榛曠獫狫荐食久絕正朔之風不覩輶
軒之使乘此戰心負斯戎足每興燔燧之警常
勞守障之民自非聖畧弘宣天綱遐頓豈能使
漢地盡收名王爭入方今九服大同萬邦齊軌
亭塞寢兵關候罷析臣誠兼家國倍深歡慶

上武帝菩提樹頌啓

臣聞擊轅小唱有慕風雅巴人洩曲實仰陽春
是以葑葵細葉有傾朝景燭火微光不能自息
伏惟陛下至德欽明玄猷廣運乃神乃聖道跨
荆嬀正覺正真功符圓極常住爲樂法喜爲甘
慈雨被於無垠睿化覃於幽顯故八風調四氣
正天下定海外安弘龍窟之威紹鷲山之法無
爲不住實愍蒼生無相乃宣引歸真域製茲道
樹顯此金容使誓願者結因頂禮者增福會途

已一古今誰二伏以器表承露東阿薦銘瑞啓
黃龍中山興頌臣雖不敏實有愚心謹上菩提
樹頌一首學謝稽古思非沈鬱不足以光揚盛
德髮髯一隅顧慙芻言伏紙慙震謹啓

上皇太子玄圃園講頌啓

竊以舜韶始唱靈儀自舞陳律纔喧風心競蕩
輕禽短葉尚識音光沐善歡心寧忘撫拊伏惟
殿下體高玄牘養道春禁牢籠文圃漁獵義河
注意龍宮研心寶印雲聚生什之材並命應王
之疋探機析理怡然不倦朱華景月詎此忘罷
屬素藏晚節玄英初氣霜竹浮陰風梧散葉從
容雅論實會神衷綱經生多幸屬此休世躊躇
奉渥得備磐濟而黠蠅未拔迷象不羈寶沒醉

衣珠沈勇額得聞勝善寧忘歌詠謹上玄圃園
講頌一首文慚綺發思闕彫英徒懷舞蹈之心
終愧清風之藻冒昧呈聞追深赧汗謹啓

上東宮叙南康王薨啓

方當逸足長衢克固蕃屏而峰摧壁毀一朝云
及綱兄弟各從王役東守西撫常願陪承甲館
同奉畫堂預得西苑賦文北塲旅食豈謂不幸
獨隔昭世異林有悲飛鳴斯切伏惟殿下愛睦
恩深常棣天篤北海云亡騎傳餘藁東平告盡
驛問留書嗚呼此恨復在茲日

謝勅賚中脩講疏啓

若觀玄圭如觀金版洽日九披流光照灼慶雲
五色垂采飢飮天經地義之宗出忠入孝之道
實立教之關鍵德行之指歸自非千年有聖得
奉皇門無以識九經之倫稟二門之致竊以周
發上聖問五行於箕子宣尼照極訪六僂於蓑
弘未有懸鏡獨曉仰均神鑒方知始畫八卦風
義有慙正名百物軒轅爲陋

謝勅示苦旱詩啓

伏以九年之水不傷堯政七載之旱無累湯朝
歲弘則公田已脩農勤則我庾惟億今者亢陽
以來爲日未久將恐督郵不黜失在汝南之守
驟霭未収無傷河南之尹而載勞興居仰發歌
詠無愛珪璧有事山川非飲食矣加之以撤膳
焉中夜不寐加之以申旦焉此唐虞之所闕如
軒頊之所不逮

謝賚扇啓

臣綱啓傳詔饒僧明奉宣敕旨垂賚細綾大文
畫柳蟬山扇二柄文均析縷香從海檀肅肅清
風卽令象簟非貴依依散彩便覺夏室含霜飲
露青蜩應三伏之脩景群飛黃雀送六月之南
風蔽日垂陰薰澤慙采浮涼滌暑蘋末愧吹聖
人造物之巧俯萃庸薄王府好玩之恩於茲下
被頂戴曲私伏增欣躍謹奉啓事謝聞

謝賚碧慮棊子屏風啓

臣綱啓宣詔王佛慧奉宣勅旨垂賚碧慮棊子
屏風二十牀極班馬之巧兼曹史之慮均天台
之翠壁雜水華之嘉名使雲母之窓慙其麗色
琉璃之扇愧其含影仰降聖慈曲垂霑逮喜逐
恩來驩同鳳舞言因謝盡更類三緘不任銘荷
之誠謹奉啓謝以聞

謝勅賜玉佩啓

臣綱言主衣裘智瑋奉宣勅旨垂賚臣玉佩一
具藍田麗彩槐水鏤文飾以金闕之珠製以魯
班之巧故以裾端照色影外生光恩發內府猥
垂霑賜臣方溫謝德比振慙聲沐浴深慈欣荷
交至

謝勅賚魏國獻錦等啓

山羊之毳東燕之席尚傳登高之文北鄴之錦
猶見胡綾織大秦之草戎布紡玄菟之花

謝勅賚善勝威勝刀啓

冰鐔含采彫琰表飾名均素質神號脫光五寶
初成曹丕先荷其一二勝今造愚臣總被其恩
錫韓非之書未足爲比給博山之筆方此更輕

謝勅賚方諸劍等啓

纔發玉函彫奇溢目始開牙檢麗飾交陳已匹
丹霞之暉乍比青雲之制身文自貴器用惟宜
寒暑兼華左右相照

謝勅賚貂坐褥席啓

東瀛美毳不著馬彪之儀北朔文茵豈問張敞
所記陰炭旣重塞井猶氷特降殊私溫華曲被
雖狐白千金織成千種李頌漢被楊降曹氈不
足以髣髴洪慈連類聖澤

謝勅賚織竹火籠啓

池水始浮庭雪向飛慈澤無涯時錫香被製此
簡枝雕斯早節文華九折用美十鑑

謝勅賚廣州堰啓

淮南承月之杯豈均符彩西國浮雲之碗非謂
瓊竒臣南珍靡究未讀秦曹之表方物罕逢不
識議郎之畫

謝勅賽大松啓

吳愧千里之尊蜀慙七菜之賦是知泮宮採芣
空入魯詩流火烹葵徒傳豳曲

謝勅賚長生米啓

堯禾五尺未足稱珍漢苗九穗方斯非擬如隨
瑞鹿若降神鳥暮律向游獻春方始食乃民天
之貴粒有延齡之名藉此資身因斯養性

謝勅賚城邊橘啓

結根壘晉垂陰陽塹甘踰石蜜味重金衣暉章
縹李豈止稱於晉世上林芙蓉非獨高於漢日

謝勅賚益州天門冬啓

逮自星橋見珍玉壘本草稱其輕身延壽實爲
上藥姬晉之重丹桂曹丕之愛落英一蒙恩錫
竊幸往代

謝勅賚河南菜啓

海水無波來因九譯周原澤洽味備百羞堯韭
未儔姬歎非喻

謝東宮賜裘啓

綱啓蒙賚豹裘一領降斯止謗垂茲信服物華
雉毳名高鷲羽綱才慙齊相受白狐之飾德謝
漢蕃均黑貂之賜地捲朔風庭流花雪故以裾
生惠氣袖起陽春荷澤知慙瞻恩興戀不任下
情謹啓事謝聞

謝東宮賜柿啓

懸霜照采凌冬挺潤甘清玉露味重金液雖復
安邑秋獻靈關晚實無以匹此嘉名方茲擅美

答安吉公主餉胡子一頭啓

方言異俗極有可觀山高水遠宛在其貌不使
去來執轡嬈彼青衣正當出入燒香還依丹轂
豈直王濟女奴獨有羅襪方便樂府行胡羞論
歌舞垂賚新奇伏增荷忭

謝邵陵王禁錮啓

臣綸習近宵人不能改過屢犯明憲三入刑科
昔繆彤掩扉曹儀著論布衣兄弟且相誠勗以
臣居長絳慚勸勵仰負慈嚴心顏戰慄